

Bunita discurso di Prome Minister Evelyn Wever-Croes riba Dia di Betico

ORANJESTAD (AAN): Prome Minister Evelyn Wever-Croes, diabierna 25 di januari mainta, na ocasion di celebracion di Dia di Betico na e Ceremonia Protocolar riba Plaza Libertador Gilberto François “Betico Croes, a entrega un discurso hopi elocuente y emocional yenando esnan presente cu un sentimento di amor y respet pa e gran luchador sr. Betico Croes kende a cumpli 81 aña.

Den su discurso, e mandatario principal di nos pais a pone hopi enfasis riba union, mesun ideologia di Betico Croes, kende a sa di uni e pueblo den e lucha pa Status aparte.

“Awe 25 di Januari, un dia nacional, nos ta celebra Dia di Betico, y nos ta conmemora su fecha natal. Si sr. Betico Croes tabata na bida, awe e a cumpli e bunita edad di 81 aña. sinembargo nos Creador tabata tin otro plan, y a yam’e na un edad di apenas 48 aña den Su Reino.

Betico tabata un persona humilde, cu un carisma enorme. Un persona mescos cu nos tur: Tata, yiu, ruman, omo, padrino, y toch mes momento un persona especial, cu a logra cosnan grandi.

Ya desde un edad hoben, el’a muestra e caracter di un Lider. Di un meneer di school el’a bira un politico y despues a comberti su mes den e politico di mas grandi cu Aruba a conoce den su historia, cargando e nomber tambe di Nos Libertador.

Betico a demostra cu si bo tin un vision, determinacion, curashi, no ta importa cuanto obstaculo crusa bo caminda, bo por sobrepassa nan.

Betico a demostra tambe e importancia di UNION. El’a sa di uni nos pueblo den e lucha pa Status Aparte. Su palabranan ta-



bata: Arubiano no ta solamente esun cu a nace na Aruba, sino tambe esun cu a haci Aruba su nacion. Y mi ta concuri completamente cu esaki. Awor nos pais Aruba ta para dilanti retonan grandi atrobe, y mi ta convenci cu si nos UNI y enfrenta nan den UNION nos lo sobrepassa esakinan.

Betico tabata tin un amor grandi pa su pueblo. Su palabranan legendario cu “e no ta un tata di un familia di mama, tata y 4 yiu so, sino un tata di henter Aruba”, ainda ta resona den nos mente. Esaki ta apenas algun di e ehempelnan cu awendia ainda, ta inspira ami, y mescos cu mi, hopi di boso.

Riba e dia di awe, mi ta pidi cada ciudadano di nos pais, pa nos mantene su



memoria bibo y traspasa e historia real di su bida y su lucha pa nos futuro generacionnan. Gobierno ta haciendo di su parti pa graba e historia aki, y inclui esaki den curriculum na schoolnan, cu e meta pa inspira nos hobennan. Pa asina no tin discusion riba e parti importante aki di nos historia. E memoria di Betico Croes mester ta eleva riba tur discusion politico, riba tur gobierno. E memoria di Betico Croes ta patrimonio nacional, y nos mester preserve.

Un pueblo cu no conoce su historia, ta un pueblo sin futuro. Especialmente den e temponan aki cu nos ta enfocando hopi riba inno-

vacion na Aruba, e vision pa futuro ta asina importante, y p’esey e compromiso di nos Gobierno, pa nos historia nunca bay perdi.

Betico a construi e cas, e hogar cu nos ta yama Aruba, y ora e cas tabata cla, e mes no por a gosa di dje pasobra el a fayece na edad hopi trempan. Pero

el a pasa nos e yabi di e cas cu yama Aruba, pa nos biba aden, pa nos lanta nos yiunan aden. Pa nos cuide, y pa nos percura pa bienestar y progreso di nos pueblo. Como sobrina y iha di Betico, ta un honor di por ta para aki awe, y e ta yena mi cu un sentimento profundo di orguyo. Orguyo di a gara e bandera, y sigui cu e lucha.

Laga nos reflexiona awe riba un dia hopi special, recordando Betico Croes como e luchador incansable kende a sacrifica asina tanto di su bida pa logra cumpli cu e deseo di su pueblo. Laga esaki ta un estimulo y sirbi como ehempel pa henter nos comunidad.

Sigui lesa pag.5

Continuacion pagina.4

Cu e ehempel di Betico inspira nos tur dia: Si Bo kier logra algo grandi den bida, Bo mester haci sacrificio y traha duro p'e. Mi ta haci un suplica na cada un di boso pa ban sigui su ehempel. Traha duro. Sin temor pa sacrificio. Lucha cu integridad y honestidad pa hiba nos pais padilanti.

Nos pais ta enfrentando retonan grandi. Pero nos tin e VISION, e DETERMINACION y sigur e CURASHI pa sobrepasa e retonan aki. Un dia manera awe, esta Dia di Betico, ta brinda nos e oportunidad pa reflexiona, pa yena nos cu inspiracion, curashi, sabiduria y amor patrio pa atende cu tur reto, y pa asina garantisar felicidad di e pueblo aki, locual Betico semper a anhele.

Mi kier a expresa den nomber di Gobierno di Aruba un palabra di DANKI na esnan cu a lucha hunto cu Betico pa realisa nos Status Aparte. Un danki na politiconan cu den e añanan despues di obtene e Status Aparte a sa di lucha pa conserve. Un danki tambe na henter su famia kendenan semper a sostene y kendenan a haci hopi sacrificio hunto cu ne. Especialmente su yiunan, Guisette, Glenbert, Junior, Gendeline. DANKI. DANKI pa a comparti boso tata cu nos pueblo. DANKI pa com-

pronde cu Betico no tabata un tata pa un hogar so di mama, tata y cuater yiu, sino un tata pa henter Aruba. Y apesar cu un dia manera awe, no ta facil pa boso, apesar cu riba un dia manera awe, lo bo a desea di por canta "E fecha glorioso" pa boso tata, boso por ta sigur cu henter e pueblo di Aruba ta sumamente agradecido pa locual cu Betico a nifica pa Aruba, y ta sumamente agradecido pa e sacrificio cu boso como yiunan a haci, pa awe nos tin nos Aruba dushi tera. Ohala cu esey ta un consuelo pa boso.

Dama y cabayeronan, mi deseo ta pa awe cada ciudadano di nos pais celebra e dia aki na grandi, ban demostra nos orguyo y nos amor pa nos pais. E orguyo cu nos pais por a conoce un lider manera Betico, pasobra hopi pais nunca a conoce un lider asina grandi".

Na final tambe, Prome Minister a yama un caloroso bon bini na Secretario di Estadio Raymond Knops y Minister di Husticia di Sint Maarten Mr. de Weever y a gradicinan pa bishita y pa celebra cu nos Dia di Betico. "Mi ta spera cu boso gosa nos dia nacional y cu e eventonan cultural cu nos tin awe na Aruba, duna bo un miho bista di nos historia y cultura, y comprende nos amor pa Aruba.